



Na osnovu člana 15. Zakona o Upravi za indirektno oporezivanje ("Službeni glasnik BiH", broj 89/05) i člana 61. stav 2. Zakona o upravi ("Službeni glasnik BiH", broj 32/02), direktor Uprave za indirektno oporezivanje donosi

U P U T S T V O

O PROVEDBI POJEDNOSTAVLJENOG POSTUPKA PRIJAVLJIVANJA ROBE NA TEMELJU NEPOTPUNE CARINSKE PRIJAVE

GLAVA I. OPĆE ODREDBE

Član 1.

(Predmet)

(1) Ovim Uputstvom bliže se propisuju uvjeti, postupak odobravanja i provedbe pojednostavljenog prijavljivanja robe za određene carinske postupke na temelju nepotpune carinske prijave (u daljnjem tekstu: nepotpuna prijava), podnošenje dodatne carinske prijave i druga pitanja u vezi pojednostavljenog postupka po nepotpunoj prijavi.

(2) Pojednostavljeni postupak na temelju nepotpune prijave iz stava (1) ovog člana može se koristiti samo kod prijavljivanja robe za sljedeće carinske postupke: stavljanje u slobodan promet, unutrašnju obradu, privremeni uvoz, obradu pod carinskom kontrolom i carinsko skladištenje, u slučajevima i pod uvjetima propisanim ovim Uputstvom.

Član 2.

(Pravni osnov)

Pojednostavljeni postupak na temelju nepotpune prijave iz člana 1. ovog Uputstva reguliran je:

- a) odredbama člana 73. Zakona o carinskoj politici Bosne i Hercegovine ("Službeni glasnik BiH", br. 57/04, 51/06 i 93/08), (u daljnjem tekstu: Zakon),
- b) odgovarajućim odredbama GLAVE 1 do GLAVE 3 u NASLOVU VIII POJEDNOSTAVLJENI POSTUPCI Odluke o provedbenim propisima Zakona o carinskoj politici Bosne i Hercegovine ("Službeni glasnik BiH", br. 63a/04, 60/06 i 57/08), (u daljnjem tekstu: Odluka),
- c) propisima o popunjavanju carinske prijave i
- d) odredbama ovog Uputstva.

Član 3.

(Korištenje odgovarajućeg opisa i šifri)

U primjeni pojednostavljenog postupka na temelju nepotpune prijave iz člana 1. ovog Uputstva, kod popunjavanja polja 30 i polja 44 nepotpune i dodatne prijave u slučajevima i na način propisan ovim Uputstvom, koristit će se odgovarajući opisi (riječi) i šifre koje označavaju sljedeće:

- a) opis "NEPOTPUNA" - koristi se za označavanje nepotpune prijave,
- b) opis "POTPUNA" - koristi se za označavanje dodatne (potpune) prijave,
- c) šifra "ZNP" - oznaka za dodatni obrazac uz nepotpunu prijavu iz člana 6. stav (2) tačka a) ovog Uputstva (kao priloženi dokument),
- d) šifra "ZPP" - oznaka za zahtjev za dopunu nepotpune prijave iz člana 11. stav (2) ovog Uputstva (kao priloženi dokument).

GLAVA II. NEPOTPUNA PRIJAVA ZA STAVLJANJE ROBE U SLOBODAN PROMET

Član 4.

(Nepotpuna prijava)

(1) Nepotpuna prijava je pojednostavljena carinska prijava, koja se, u opravdanim slučajevima, podnosi u pisanom obliku na obrascu Jedinствene carinske deklaracije (JCI) ili korištenjem tehnike obrade podataka (DTI prijava), a:

- a) koja ne sadrži sve podatke koji bi morali biti navedeni za odobravanje stavljanja robe u slobodan promet, ali obavezno mora sadržavati podatke koji, shodno članu 162. Odluke, moraju biti navedeni u toj prijavi, ili
- b) kojoj nisu priložena sva propisana dokumenta, s tim da moraju biti priložena ona dokumenta koja se moraju predložiti prije nego se prijavljena roba može staviti u slobodan promet (odobrenje, dozvola i slična dokumenta).

(2) Izuzetno od stava (1) tačka b) ovog člana, može se prihvatiti nepotpuna prijava kojoj nisu priložena sva dokumenta potrebna za odobravanje stavljanja robe u slobodan promet, uz uvjet da nadležnom carinskom uredu prethodno dokaže da:

- a) dokument koji nije priložen postoji i da je važeći (npr. original uvoznu dozvolu deklarant ne može predložiti uz nepotpunu prijavu jer s istom još ne raspolaže, ali ima njenu kopiju; original EUR.1 ili original faktura s izjavom o porijeklu još nije pristigla deklarantu, ali on već ima kopiju),
- b) dokument nije mogao biti priložen nepotpunoj prijavi iz razloga na koje deklarant nije mogao utjecati (npr. deklarant je podnio zahtjev za izdavanje dozvole za uvoz i ima dokaz od nadležnog organa da će ona biti izdata),
- c) bi svako kašnjenje u prihvatanju nepotpune prijave spriječilo stavljanje robe u slobodan promet ili učinilo da roba podliježe većoj stopi dažbina.

(3) Nepotpuna prijava za stavljanje robe u slobodan promet se može koristiti samo u opravdanim slučajevima, kada deklarantu u trenutku podnošenja nepotpune prijave nije dostupan original dokaza o porijeklu robe za koju pri stavljanju u slobodan promet zahtjeva povlašteni preferencijalni tretman, uz uvjet da je uz nepotpunu prijavu priložio kopiju dokaza o porijeklu robe u kojoj su podaci jasni, zatim u slučajevima kada deklarantu u trenutku podnošenja nepotpune prijave nisu poznati konačni podaci vezani za carinsku vrijednost robe ili ne raspolaže sa svim dokumentima (originalom), te u drugim sličnim slučajevima.

Član 5.

(Popunjavanje nepotpune prijave)

(1) Izuzetno od člana 4. stav (1) tačka a) ovog Uputstva, u nepotpunoj prijavi, radi njene tehničke podrške u informacionom sistemu ASCYUDA, deklarant treba popuniti sva polja koja se, prema propisima kojima je regulirano pitanje popunjavanja carinske prijave, popunjavaju za carinski postupak zahtijevan nepotpunom prijavom (kao da se radi o redovnoj carinskoj prijavi), na način propisan tim propisima, uključujući i pravila navedena u stavu (2) ovog člana.

(2) Kod popunjavanja nepotpune prijave, pored stava (1) ovog člana, primjenjuju se i sljedeća pravila:

- a) u polje 30 (Mjesto robe) upisuje se riječ "NEPOTPUNA" (uvijek velikim latiničnim slovima),
- b) u polju 44 (Dodatne informacije, priložene isprave, uvjerenja i odobrenja), pored ostalog, mora biti naveden i dodatni obrazac uz nepotpunu prijavu iz člana 6. stav (2) tačka a) ovog Uputstva koji se označava šifrom "ZNP", koju šifru će sistem ASCYUDA sam unijeti u to polje, odnosno u dodatni ekran "priloženi dokumenti" kada se u polje 30 upiše riječ "NEPOTPUNA", dok deklarant upisuje podatke o broju i datumu tog obrasca iz njegove evidencije,
- c) u polju 44 unose se i podaci koji se odnose na dokument koji nedostaje uz nepotpunu prijavu, ako je u pitanju ta situacija (npr. broj i datum EUR.1 ili fakture s izjavom o porijeklu iz njihove kopije).

(3) Opis robe u nepotpunoj prijavi mora biti dovoljno tačan, precizan i nedvosmislen i da carinskom uredu omogući momentalnu identifikaciju robe i njeno ispravno svrstavanje po carinskoj i drugim tarifama, te utvrđivanje mogućeg iznosa uvoznih dažbina i drugih indirektnih poreza (u daljnjem tekstu: carinski dug) za koji je potrebno položiti garanciju prije puštanja robe.

(4) Ako pri prijavljivanju robe po nepotpunoj prijavi deklarant ne može dati podatke o carinskoj vrijednosti robe iz razloga što mu konačni podaci o tome nisu poznati (npr. u kupoprodajnom ugovoru je naznačena klauzula da će se cijena prodane robe utvrditi prema cijeni na berzi određenog dana, a roba stigne prije naznačenog dana), dužan je u nepotpunoj prijavi navesti privremene podatke o carinskoj vrijednosti kojima raspolaže.

(5) Ako deklarant zahtijeva primjenu preferencijalne tarifne mjere ili preferencijalne tarifne mjere u okviru tarifnog kontigenta (kvota) ili u okviru gornjeg tarifnog limita, a u trenutku podnošenja nepotpune prijave ne posjeduje original dokaza o porijeklu robe (bez obzira koji dokaz o porijeklu robe je u pitanju) koji je uvjet za odobravanje tražene preferencijalne tarifne mjere za tu robu, dužan je uz nepotpunu prijavu podnijeti kopiju tog dokumenta, o kojem podaci trebaju biti unijeti u polje 44 nepotpune prijave.

Član 6.

(Podnošenje nepotpune prijave)

(1) Pojednostavljeno prijavljivanje robe shodno članu 73. stav 1. tačka (a) Zakona vrši se podnošenjem nepotpune prijave carinskom uredu (carinskoj ispostavi) kod kojeg je roba predočena, koja prijava se smatra i zahtjevom za navedeni pojednostavljeni postupak.

(2) Uz nepotpunu prijavu, deklarant podnosi:

- a) dodatni obrazac uz nepotpunu prijavu ("ZNP"), popunjen u dva primjerka, čiji izgled i sadržaj je dat u Prilogu 1. ovog Uputstva. U tom obrascu, koji ne podliježe naplati administrativne takse, treba biti navedeno koja polja nepotpune prijave, tj. koji podaci u toj prijavi su privremeni i koja dokumenta nedostaju, uz obrazloženje razloga za to, te

- navedeni i drugi podaci neophodni za prihvatanje nepotpune prijave, obzirom da se ti podaci ne mogu unijeti u nepotpunu prijavu,
- b) kopiju nedostajućeg dokumenta, ako je u pitanju ta situacija,
 - c) izjavu iz člana 10. ovog Uputstva za osiguranje mogućeg carinskog duga (s kopijom garancije navedene u toj izjavi) u slučajevima gdje je to predviđeno, dok se u drugim slučajevima taj dug se obezbjeđuje na način propisan navedenim članom.

(3) Prihvatanje nepotpune prijave od strane carinskog ureda je ujedno i odobrenje za pojednostavljeni postupak po toj prijavi. Priloženi dodatni obrazac uz nepotpunu prijavu iz stava (2) tačka a) ovog člana dobiva broj i datum prihvaćene nepotpune prijave (podaci iz polja A te prijave), a na istom (II dio) carinski ured stavlja zabilješku da se odobrava prijavljivanje robe na temelju nepotpune prijave, što postupajući službenik potvrđuje potpisom (uz navođenje i službene šifre) i ovjerava službenim pečatom. Navedena zabilješka treba da sadrži i: šifru "ZNP", te vrstu, broj i datum prihvaćene nepotpune prijave (npr. "ZNP/IM4 C 756/07.05.09.").

(4) Carinski ured na dodatnom obrascu uz nepotpunu prijavu (II dio), pored podataka iz stava (3) ovog člana, navodi i druge podatke u vezi postupka po nepotpunoj prijavi (npr. koja situacija iz člana 165. odluke kod obračuna i knjiženja uvoznih dažbina se primjenjuje), te rok za dopunu nepotpune prijave, tj. rok za podnošenje nedostajućeg podatka ili dokumenta, nakon čega jedan primjerak tog obrasca zadržava uz nepotpunu prijavu, a drugi vraća deklarantu.

Član 7.

(Prihvatanje nepotpune prijave)

(1) Nadležni carinski ured može prihvatiti nepotpunu prijavu samo ako za to deklarant ispunjava propisane uvjete.

(2) Korištenje nepotpune prijave ne može se odobriti kada su svi podaci i dokumenta na raspolaganju deklarantu u momentu prijavljivanja robe za stavljanje u slobodan promet ili će biti dostupni u veoma kratkom roku.

(3) U slučajevima kada deklarant u trenutku podnošenja nepotpune prijave ne raspolaže dokumentom (dokazom o porijeklu) potrebnim za odobravanje tražene preferencijalne mjere (nema ni kopije tog dokumenta), nema osnova za primjenu takve mjere, niti za podnošenje i prihvatanje nepotpune prijave, već se provodi redovan postupak carinjenja.

(4) U provedbi postupka po nepotpunoj prijavi nadležni carinski ured postupa na uobičajeni način kao kod redovne carinske prijave.

(5) Nepotpuna prijava podliježe modulu selektiviteta, odnosno analizi rizika, ovisno od toga koje mjere i kontrole carinski ured smatra potrebnim u svakom konkretnom slučaju, s tim da je kod nepotpune prijave isključen zeleni put selektiviteta, obzirom da carinski ured mora prethodno pregledati nepotpunu prijavu i dokumenta priložena uz nju, da bi mogao odlučiti o prihvatanju nepotpune prijave.

(6) Carinski ured prihvaćenu nepotpunu prijavu drži fizički odvojenu od redovnih carinskih prijava, sve dok se ista ne upotpuni nedostajućim podatkom ili dokumentom i u cijelosti okonča po njoj zahtijevani carinski postupak, tj. dok nepotpuna prijava ne dobije konačan status, kada se odlaže u arhivu po njenom rednom broju.

Član 8.

(Rok za dopunu nepotpune prijave)

(1) Ako carinski ured prihvati nepotpunu prijavu, odobrit će primjeren rok za dopunu nepotpune prijave, u kojem roku je deklarant obavezan dostaviti sve podatke ili dokumenta koji su nedostajali u trenutku prihvatanja nepotpune prijave. Taj rok ne može biti duži od 30 dana od dana prihvatanja nepotpune prijave. Pri tome se može u obzir uzeti rok koji je deklarant naveo u svom zahtjevu, ako je taj rok u okviru propisanog roka (kraći od 30 dana).

(2) U slučaju kada nedostaje original dokument koji je potreban za odobravanje tražene preferencijalne tarifne mjere (član 5. stav (5) ovog Uputstva), a carinski ured osnovano smatra da bi se za robu obuhvaćenu nepotpunom prijavom mogla odobriti tražena preferencijalna mjera, može za podnošenje tog dokumenta, na opravdani zahtjev deklaranta, odobriti dodatni rok, koji rok ne može biti duži od 120 dana od dana prihvatanja nepotpune prijave i ne može se produžiti.

(3) Ako se podatak ili dokument koji nedostaje odnose na carinsku vrijednost, carinski ured može, izuzetno (uobičajeno se određuje rok do 30 dana), ako je to s obzirom na okolnosti datog slučaja neophodno, odrediti duži rok ili produžiti prvobitno određeni rok.

(4) Rok za dopunu nepotpune prijave, u skladu s ovim članom, odnosno članom 164. Odluke, carinski ured odobrava prema okolnostima svakog konkretnog slučaja.

(5) Odobreni rok za dopunu nepotpune prijave, odnosno za dostavljanje nedostajućeg podatka ili dokumenta, carinski ured unosi u zabilježci na dodatnom obrascu uz nepotpunu prijavu iz člana 6. ovog Uputstva i u polje D/J nepotpune prijave.

Član 9.

(Puštanje robe kod
nepotpune prijave i carinski dug)

(1) Prihvatanje nepotpune prijave od strane carinskog ureda ne može spriječiti ili odgoditi puštanje tako prijavljene robe deklarantu, osim ako za to ne postoje drugi razlozi. Bez odstupanja od člana 155. Odluke, puštanje se vrši u skladu s uvjetima iz člana 165. Odluke, odnosno uvjetima iz ovog člana.

(2) Kada naknadno dostavljanje podatka ili originala dokumenta koji je nedostajao u trenutku prihvatanja nepotpune prijave ne utiče na visinu carinskog duga kojima podliježe roba obuhvaćena navedenom prijavom, carinski ured odmah knjiži iznos carinskog duga obračunatog na uobičajeni način (kao u redovnom postupku carinjenja).

(3) Kada, u skladu sa članom 5. stav (4) ovog Uputstva, nepotpuna prijava sadrži nepotpune (privremene) podatke koji se odnose na carinsku vrijednost robe, carinski ured:

- a) odmah knjiži iznos carinskog duga obračunatog na osnovu privremenih podataka, te
- b) zahtijeva da deklarant, na način propisan članom 10. ovog Uputstva, obezbijedi garanciju u visini razlike između iznosa carinskog duga obračunatog na osnovu privremenih podataka i iznosa carinskog duga kojem bi roba na kraju mogla podliježati (obračunatog na temelju podataka kojima raspolaže carinski ured, primjenom jedne od ostalih metoda utvrđivanja carinske vrijednosti propisanih odredbama člana 27. do 28. Zakona).

(4) U drugim slučajevima od onih navedenih u stavu (3) ovog člana, kada naknadno dostavljanje podatka ili originala dokumenta može uticati na visinu carinskog duga kojem podliježe roba koja je obuhvaćena nepotpunom prijavom:

- a) ako naknadno dostavljanje bilo kojeg nedostajućeg podatka i originala dokumenta može dovesti do primjene uvoznih dažbina po sniženoj stopi (npr. situacija iz člana 5. stav (5) ovog Uputstva), carinski ured:
 - 1) odmah knjiži iznos carinskog duga plativog po sniženoj stopi, te
 - 2) zahtijeva da deklarant, na način propisan članom 10. ovog Uputstva, obezbijedi garanciju u visini razlike između tog iznosa carinskog duga i iznosa koji bi deklarant trebao platiti da je carinski dug na odnosnu robu obračunat po redovnoj stopi carine,
- b) ako naknadno dostavljanje bilo kojeg nedostajućeg podatka i originala dokumenta može dovesti do puštanja robe u slobodan promet uz potpuno oslobođanje od plaćanja uvozne dažbine, carinski ured zahtijeva od deklaranta obezbjeđenje garancije na način propisan članom 10. ovog Uputstva, koja će pokriti iznos carinskog duga koji bi deklarant trebao platiti da su dažbine obračunate po redovnoj stopi.

(5) Bez obzira na moguće naknadne izmjene do kojih može doći, deklarant može, umjesto polaganja garancije u slučajevima iz stava (3) tačka (b), stava (4) tačka a) druga alineja i stava (4) tačka b) ovog člana, zahtijevati da carinski ured odmah knjiži:

- a) iznos carinskog duga kojem bi roba na kraju mogla podlijegati, kada se primjenjuje stav (3) tačka b) ili stav (4) tačka a) druga alineja ovog člana, ili
- b) iznos carinskog duga obračunatog po redovnoj stopi, kada se primjenjuje stav (4) tačka b) ovog člana.

(6) Iznos mogućeg carinskog duga koji se obezbjeđuje garancijom u slučajevima iz stava (3) tačka b), stava (4) tačka a) druga alineja i stava (4) tačka b) ovog člana, te izjavu iz člana 10. ovog Uputstva i broj pod kojim je garancija, navedena u izjavi, prihvaćena od strane organizacione jedinice Uprave za indirektno oporezivanje nadležne za prihvatanje garancija, carinski ured obavezno upisuje u polje C nepotpune prijave (npr. mogući dug 1.200,00 KM, izjava o garanciji broj 396/09).

(7) Neovisno od stava (8) ovog člana, carinski dug obračunat i knjižen po nepotpunoj prijavi u skladu sa stavom (2), stavom (3) tačka a), stavom (4) tačka a) prva alineja ili u skladu sa stavom (5) ovog člana (ovisno koja situacija je u pitanju) se plaća odmah, ili u roku od 10 dana, ako je isti u tom roku obezbijeđen valjanom garancijom upisanom u polje 48 nepotpune prijave.

(8) Carinski ured, nakon okončanja postupka po prihvaćenoj nepotpunoj prijavi, istu upućuje na plavi put selektiviteta do isteka odobrenog roka za dopunu te prijave, tj. dok se nepotpuna prijava ne upotpuni i ne dobije konačan status u skladu sa članom 11. ovog Uputstva.

(9) U slučaju kada deklarant, u pogledu obračuna carinskog duga po nepotpunoj prijavi, koristi mogućnost propisanu stavom (5) ovog člana, o povratu mogućeg iznosa više plaćenog carinskog duga nakon dopunjavanja nepotpune prijave nedostajućim podatkom ili dokumentom, odlučuje se u redovnom carinsko upravnom postupku u skladu sa članom 11. stav (7) ovog Uputstva.

Član 10.

(Garancija za obezbjeđenje mogućeg carinskog duga po nepotpunoj prijavi)

(1) Deklarant je u obavezi obezbijediti garanciju za obezbjeđenje naplate mogućeg carinskog duga po prihvaćenoj nepotpunoj prijavi u slučajevima iz člana 9. stav (3) tačka b), stav (4) tačka a) druga alineja i stav (4) tačka b) ovog Uputstva, a garanciju obezbjeđuje davanjem posebne izjave, čiji je izgled i sadržaj dat na obrascu iz Priloga 2. ovog Uputstva, osim za akciznu robu. Izjava mora biti u svemu popunjena, tj. u istoj moraju biti navedeni svi traženi podaci o garanciji kojom se osigurava naplata mogućeg carinskog duga u navedenim slučajevima, koja je prethodno prihvaćena za carinski postupak na koji se nepotpuna prijava odnosi od strane organizacione jedinice Uprave za indirektno oporezivanje nadležne za prihvatanje garancija, a kopija odnosne garancije se prilaže uz izjavu. Izjava mora biti potpisana i ovjerena od strane deklaranta. Garancija o kojoj se podaci navode u izjavi je

garancija kojom se kod postupajućeg carinskog ureda redovno obezbjeđuje carinski dug u carinskom postupku na koji se odnosi nepotpuna prijava. Rok važenja garancije navedene u izjavi ne može biti kraći od roka za dopunu nepotpune prijave kojeg je carinski ured odobrio u skladu sa članom 8. ovog Uputstva, u protivnom garancija se ne može prihvatiti ili se navedeni rok ne može odobriti (niti produžiti) u trajanju dužem od roka važenja položene garancije.

(2) Iznos mogućeg carinskog duga za akciznu robu po nepotpunoj prijavi u slučajevima iz stava (1) ovog člana deklarant je dužan obezbijediti polaganjem garancije, koja garancija može biti posebna garancija za nepotpunu prijavu ili sveobuhvatna garancija za carinski postupak na koji se odnosi nepotpuna prijava iz koje je određeni iznos sredstava raspoređen za nepotpunu prijavu, čije zaduženje i razduženje prati carinski ured.

(3) Ako za obezbjeđenje mogućeg carinskog duga u slučajevima iz stava (1) i (2) ovog člana garanciju obezbjeđuje ovlašteni zastupnik deklaranta, u tom slučaju izjavu iz stava (1) ovog člana daje ovlašteni zastupnik, odnosno polaže garanciju iz stava (2) ovog člana, ovisno koja situacija je u pitanju.

(4) Garanciju kojom se obezbjeđuje mogući carinski dug po nepotpunoj prijavi organizaciona jedinica Uprave za indirektno oporezivanje nadležna za prihvatanje garancija ne može vratiti korisniku navedenom u garanciji sve dok mogući carinski dug po nepotpunoj prijavi obezbijeđen tom garancijom ne bude u cijelosti plaćen.

Član 11.

(Dopuna nepotpune prijave i carinski dug)

(1) Deklarant je obavezan nepotpunu prijavu koju je carinski ured prihvatio dopuniti u roku odobrenom mu u skladu sa članom 8. ovog Uputstva.

(2) Dopunu nepotpune prijave deklarant će vršiti podnošenjem zahtjeva za dopunu nepotpune prijave, u kojem zahtjevu, pored podataka o nepotpunoj prijavi koju dopunjuje, mora navesti i koji nedostajući podatak i dokument dopunjuje, te isti priložiti uz zahtjev. Zahtjev za dopunu nepotpune prijave ne podliježe naplati administrativne takse, jer se njime preuzima jedna od radnji u pojednostavljenom postupku po nepotpunoj prijavi.

(3) Kod dopune nepotpune prijave, kao datum za određivanje visine carinskog duga i primjenu drugih propisa koji se odnose na stavljanje robe u slobodan promet primjenjuje se datum prihvatanja nepotpune prijave.

(4) Ukoliko se dopunski podatak, odnosno dokument razlikuju u odnosu na podatke navedene u nepotpunoj prijavi ili priloženim joj dokumentima, carinski ured će, na temelju podnijetog zahtjeva iz stava (2) ovog člana, nakon izvršene provjere istog, izvršiti modifikaciju nepotpune prijave, tako što će:

- a) u odgovarajuća polja nepotpune prijave, umjesto ranijih unijeti dopunjene podatke,
- b) u polje 30 (Mjesto robe) upisati riječ "POTPUNA" (uvijek velikim latiničnim slovima),
- c) u polju 44 (Dodatne informacije, priložene isprave, uvjerenja i odobrenja), uz šifru "ZPP" (kojom se označava zahtjev za dopunu nepotpune prijave, koju šifru će sistem ASCYUDA sam unijeti u ovo polje, odnosno u dodatni ekran "priloženi dokumenti" kada se u polje 30 upiše riječ "POTPUNA") unijeti podatke o broju i datumu kojeg nosi taj zahtjev iz evidencije deklaranta.

(5) Carinski ured, nakon izvršene modifikacije nepotpune prijave u skladu sa stavom (4) ovog člana, prijavu sa plavog puta selektiviteta upućuje u konačan status. Modifikovanu prijavu štampa u dva primjerka i ovjerava, od čega jedan primjerak uručuje deklarantu, a drugi primjerak zadržava, te uz

isti prilaže nepotpunu prijavu i sva dokumenta koja se odnose na te prijave (jer nepotpuna i dopunjena prijava čine jedinstven dokument), nakon čega istu odlaže u arhivu po njenom rednom broju.

(6) Ako dopuna nepotpune prijave dovodi do izmjene podataka o obračunu carinskog duga u polju 47 prijave, koju izmjenu će ispratiti informacijski sistem, te, ovisno od situacije, iskazati razliku za plaćanje ili razliku za povrat (umanjenje više plaćenog carinskog duga po nepotpunoj prijavi). U tom slučaju, informacijski sistem će "tražiti" i može ispratiti samo plaćanje obračunate i knjižene razlike carinskog duga za plaćanje, a carinski ured će dalje pratiti plaćanje te razlike carinskog duga, o kojem se neće donositi posebna odluka.

(7) Ako dopuna nepotpune prijave dovodi do povrata više plaćenog carinskog duga po nepotpunoj prijavi (npr. situacija iz člana 9. stav (5) i stav (9) ovog Uputstva), carinski ured će dalje, u svakom slučaju, nakon modifikacije nepotpune prijave, zahtjev za dopunu nepotpune prijave, zajedno s obe verzije carinske prijave (nepotpuna i potpuna) koja je u pitanju, te obračunom razlike carinskog duga za povrat i drugom dokumentacijom, po službenoj dužnosti, dostaviti Odsjeku za carine kojem organizaciono pripada, radi donošenja rješenja o povratu više plaćenog carinskog duga u redovnom carinsko upravnom postupku, koje rješenje je sastavni dio odnosne carinske prijave i isto se dostavlja i carinskom uredu čija je prijava. Carinski ured dostavljeno mu rješenje odlaže uz carinsku prijavu na koju se odnosi, a broj i datum tog rješenja obavezno unosi u polje C potpune (konačne) prijave i u inspekcijskom aktu te prijave (npr. Rješenje o povratu duga, UP/I-354/09 od 30.01.2009.), čime se kod carinskog ureda završava postupak po nepotpunoj prijavi. Carinski ured po tom rješenju ne može vršiti nikakvu izmjenu (modifikaciju) prijave u informacionom sistemu, a samo rješenje je predmetom izvršenja po postupku po kojem se izvršavaju odluke donijete u redovnom carinsko upravnom postupku.

(8) Kada dopunski podatak, odnosno dopunski dokument ne dovodi do promjene podataka u nepotpunoj prijavi, u tom slučaju carinski ured će, na temelju podnijetog zahtjeva iz stava (2) ovog člana, nakon izvršene provjere istog, izvršiti modifikaciju nepotpune prijave, tj. prevesti je u konačan status tako što će u polje 30 (Mjesto robe) upisati riječ "POTPUNA" (uvijek velikim latiničnim slovima), a u polje 44 unijeti podatke o navedenom zahtjevu na način propisan stavom (4) tačka c) ovog člana, čime se istovremeno potvrđuje i da je izvršena obaveza dostavljanja dopunskog podatka, odnosno dopunskog dokumenta. Ako dopuna uključuje dostavljanje nedostajućeg dokumenta, dostavljeni originali odnosno dokumenta carinski ured prilaže uz prijavu, a podatke o istom, pri modifikaciji nepotpune prijave, unosi u polje polje 44 (Dodatne informacije, priložene isprave, uvjerenja i odobrenja), osim ako ti podaci već nisu upisani u nepotpunoj prijavi na osnovu njegove kopije.

Član 12.

(Postupanje po proteku roka
za dopunu nepotpune prijave)

Ukoliko deklarant do isteka roka za dopunu nepotpune prijave kojeg je odredio carinski ured u skladu sa članom 8. ovog Uputstva, ne podnese podatke koji su potrebni za konačno utvrđivanje carinske vrijednosti robe, odnosno ne dostavi nedostajući podatak ili dokument, a to ima uticaja na visinu carinskog duga, carinski ured, u skladu sa članom 166. Odluke, kao carinski dug kojem određena roba podliježe odmah knjiži iznos za koji je položena garancija u skladu sa članom 9. stav (3) tačka b), stav (4) tačka a) druga alineja ili stav (4) tačka b) ovog Uputstva i poduzima radnje za naplatu tog duga.

Član 13.

(Neodobravanje podnošenja nepotpune prijave)

Deklarantu, koji u roku za dopunu nepotpune prijave određenom mu u skladu sa članom 8. ovog uputstva (rok naveden u polju D/J nepotpune prijave), ne ispuní obaveze koje prizilaze iz pojednostavljenog postupka po nepotpunoj prijavi i time dovede do naplate mogućeg carinskog duga prinudnim putem, carinski ured neće dalje odobriti podnošenje nepotpune prijave u periodu od šest mjeseci od nastanka prve takve situacije pod uvjetom da je do tada u cijelosti izmiren carinski dug nastao po nepotpunoj prijavi, s pripadajućim kamatama, tj. da nema neizmirenih obaveza po bilo kojoj nepotpunoj prijavi.

GLAVA III. NEPOTPUNA PRIJAVA U POSTUPCIMA S EKONOMSKIM UČINKOM**Član 14.**

(Nepotpuna prijava)

Nepotpuna prijava može se koristiti u postupcima s ekonomskim učinkom navedenim u članu 1. stav (2) ovog Uputstva i to samo u slučajevima kada u trenutku podnošenja nepotpune prijave za neki od tih postupaka deklarantu nije dostupan original dokaz o porijeklu robe za koju je u toj nepotpunoj prijavi prijavljeno preferencijalno porijeklo. U tom slučaju, uz nepotpunu prijavu, mora biti priložena kopija dokaza o porijeklu robe u kojoj su podaci jasni.

Član 15.

(Postupanje po nepotpunoj prijavi)

(1) U postupanju po nepotpunoj prijavi u postupcima s ekonomskim učinkom iz člana 14. ovog Uputstva odgovarajuće primjenjuju se odredbe člana 5. do 8. i člana 10. do 13. ovog Uputstva. Ako se nepotpuna prijava odnosi na postupak unutrašnje obrade po sistemu povrata dažbina, također se odgovarajuće primjenjuje i član 9. ovog Uputstva. Pri odobravanju roka za dopunu nepotpune prijave u navedenim carinskim postupcima s ekonomskim učinkom, treba imati u vidu i odobreni rok za razduživanje postupka s ekonomskim učinkom koji je u pitanju.

(2) Razduživanje postupka iz stava (1) ovog člana nadležni carinski ured ne može prihvatiti prije nego što nepotpuna prijava po kojoj je roba stavljena u taj postupak bude dopunjena, odnosno konačna.

GLAVA IV. PRIJELAZNE I ZAVRŠNE ODREDBE**Član 16.**

(Sastavni dio uputstva)

Sastavni dio ovog Uputstva čine Prilog 1. (Dodatni obrazac uz nepotpunu prijavu) iz člana 6. stav (2) tačka a) ovog Uputstva i Prilog 2. (Obrazac Izjave o obezbjeđenju carinskog duga po nepotpunoj prijavi) iz člana 10. ovog Uputstva.

Član 17.
(Stupanje na snagu)

Ovo Uputstvo stupa na snagu osmog dana od dana objavljivanja u "Službenom glasniku BiH".

Broj: 01-02-02-166-6/09
Datum: 28.04.2009. godine

DIREKTOR
Kemal Čaušević